

Ny Tenin'Andriamanitra dia  
tonga tamin'ny Mpaminany  
William Marrion Branham

### **“Raiso Ny Peninao Ka Manorata”**

*Indray hariva raha teo am-pitadiavana ny Tompo aho, dia nilaza tamiko ny Fanahy Masina mba handray ny peniko ka hanoratra. Ary rehefa nihazona ny penina aho mba hanoratra, dia nanome ahy hafatra anankiray ho an'ny fiangonana ny Fanahiny. Tiako ny hitondra izany eto aminareo. Mahakasika ny Tenin'Andriamanitra sy ny ampakarina ilay izy.*

Indro ary fa handramako holazaina aminareo. Ny lalàn'ny fampitomboan-taranaka dia ny hoe ny voa tsirairay dia hamokatra araka ny karazany avy, araka ny Genesisy 1:11, “Ary Andriamanitra nanao hoe, Aoka ny tany haniry ahitra, sy anana mamoa, ary hazo fihinam-boa izay izay mamoa samy araka ny karazany avy, ka manam-boa ao aminy, eny ambonin’ny tany: dia nisy izany.” Izay karazan’aina tao amin’ilay voa no nivoaka tao amin’ilay zava-maniry ary avy eo dia tao anatin’ny voankazo. Io lalàna io ihany no ampiharina amin’ny fiangonana ankehitriny. Izay voa nanomboka tao amin’ny

fiangonana no hivoaka ary ho tahaka an'ilay voa tany am-piandohana satria voa iray ihany ilay izy. Amin'izao andro farany izao ilay tena Fiangonana Ampakarina (voan'i Kristy) dia ho tonga eo amin'ilay Vato sarona, ary ho fiangonana tena tsara izy io, ambony firazanana, rehefa manakaiky Azy. Ireo izay ao amin'ny ampakarina dia tena hitovy Aminy tanteraka ka tena ho araka ny Endriny mihitsy aza. Izany dia ny mba hiraisana Aminy. Ho iray izy ireo. Izy ireo no ho tena fanehoana marina ny Tenin'Andriamanitra velona. Ireo anaram-pianganana dia tsy afaka hamokatra an'io (voa ratsy). Hamokatra an'ireo fombafombany sy ireo foto-pampianarany izy ireo, mifangaroaharo amin'ny Tenin'Andriamanitra. Io fampifangaroana io dia manome vokatra safiotra.

Ilay zanakalahy voalohany (Adama) dia Teny-voa an'Andriamanitra. Nomena vady anankiray izy mba hahafahany manaranaka. Izay no antony nanomezana azy vady anankiray, mba hanaranaka; mba hamokatra zanakalahin'Andriamanitra iray hafa. Kanefa lavo izy. Lavo tamin'ny fampifangarongaroana izy. Izy no nahatonga azy ho faty.

Ilay Zanakalahy faharoa (Jesosy), izay Teny-Voa anankiray an'Andriamanitra ihany koa dia nomena vady anankiray tahaka an'i Adama.

Saingy talohan'ny Nanambadiany azy, dia lavo koa izy io. Izy io, tahaka ny vadim'i Adama, dia nozahan-toetra na hino ny Tenin'Andriamanitra izy dia ho velona, na hisalasala amin'ny Teny ka ho faty. Nisalasala izy. Navelany ny Teny. Maty izy.

Avy amin'andian'olona vitsy avy tamin'ny voan'ny Teny marina, no hanoloran'Andriamanitra an'i Kristy vady malala anankiray. Virijiny amin'ny Teniny izy io. Virijiny izy satria tsy mahalala fombafomba na foto-pampianarana nataon'olombelona. Avy amin'ireo sy amin'ny alalan'ireo mpikamban'ny ampakarina ireo no ho tanteraka izay rehetra nampanantenain'Andriamanitra fa ho voaseho ao amin'ny virijiny.

Tonga tamin'i Maria virijiny ny teny fampanantenana. Fa io Teny fampanantenana io anefa dia Izy, Izy Tenany ihany, mba ho voaseho. Lasa voaseho Andriamanitra. Izy, Izy Tenany ihany, no niasa tamin'izany fotoana izany ary nanatanteraka ny Teny Fampanantenany tao amin'ilay virijiny. Anjely iray no nitondra ny hafatra teo aminy. Fa ny hafatr'ilay anjely anefa dia ny Tenin'Andriamanitra. Isaia 9:6. Notanterahiny tamin'io fotoana io avokoa izay rehetra voasoratra momba Azy satria nanaiky ny Teniny ho azy izy.

Ireo mpikamban'ny virijiny ampakarina dia ho tia Azy, ary hanana ny Heriny izy ireo, satira Izy no lohan'izy ireo, ary ny hery rehetra dia Azy avokoa. Manaiky Azy izy ireo tahaka ny rantsam-batantsika manaiky ny lohantsika.

Mariho ilay firindrana eo amin'ilay Ray sy ilay Zanaka. Tsy manao na inona na inona mihitsy Jesosy raha tsy efa nasehon'ny Ray Azy aloha izany. Jaona 5:19. Io firindrana io dia tokony hisy ankehitriny eo amin'ny Mpampakatra sy ny Ampakariny. Asehony azy ny Teny Fiainany. Dia raisiny izany. Tsy misalasala ny amin'izany izy. Noho izany, dia tsy misy afaka hanimba azy, na dia ny fahafatesana aza. Satria rehefa nambolena ny voa, dia ny rano no hampiakatra azy indray. Izao no tsiambaratelon'izany. Ny Teny dia ao amin'ny ampakarina (tahaka ny naha-tao amin'i Maria azy). Manana ny fissainan'i Kristy ny ampakarina satria fantany izay Tiany hatao miaraka amin'ny Tenin'Andriamanitra. Manatanteraka ny baikon'ny Tenin'Andriamanitra amin'ny Anarany izy satria manana ny "hoy ny Tompo hoe." Avy eo dia velomin'ny Fanahy ny Tenin'Andriamanitra ary lasa tanteraka ilay izy. Tahaka ny voa iray izay nambolena sy notondrahana, dia tonga amin'ny fijinjana feno izy, manatanteraka ny tanjony.

Ireo izay ao amin'ny ampakarina dia hanao ny Sitrapony fotsiny. Tsy misy olona afaka

hampanao azy ireo zavatra hafa. Manana ny “hoy ny Tompo hoe” izy ireo raha tsy izany dia mipertraka tsara fotsiny. Fantatr’izy ireo fa tsy maintsy Andriamanitra ao anatiny no hanao ny asa, manatanteraka ny Teniny ihany. Tsy mbola nahafeno ny Asany rehetra Izy fony tao amin’ny Asam-panompoany tety an-tany koa ankehitriny dia miasa ao sy amin’ny alalan’ny ampakarina Izy. Fantany izany, satria tsy mbola io no fotoana ho Azy hanaovana ny zavatra sasany izay tsy maintsy Hataony ankehitriny. Saingy ho Tanterahiny amin’ny alalan’ny ampakarina kosa ankehitriny io asa izay Najanony ho an’io fotoana manokana io.

Ankehitriny dia aoka isika hijoro tahaka an’i Josoa sy Kaleba. Ny tany nampanantenaina antsika dia manomboka hita maso tahaka ny tamin’izy ireo ihany koa. Ary Josoa dia midika hoe “Jehovah-Mpamonjy,” ary izy no maneho ny mpitarika amin’ny andro farany izay ho tonga eo amin’ny fiangonana tahaka ny nahatongavan’i Paoly ho mpitarika voalohany ihany koa. Kaleba no maneho an’ireo izay nitoetra mahatoky niaraka tamin’i Josoa. Tsarovinareo, Andriamanitra dia nanomboka tamin’ny Israely toy ny virijiny anankiray amin’ny Teniny. Saingy nila zavatra hafa izy ireo. Dia nanao tahaka an’izany koa ny fiangonan’ny andro farany.

Mariho ilay tsy nanetsehan'Andriamanitra ny Israely, na ny tsy namelany azy niditra tao amin'ny tany nampanantenaina raha tsy tamin'ny fotoana Voatendriny ireny ihany. Ary ny vahoaka dia mety nanery an'i Josoa, ilay mpitarika, ka niteny hoe, "Antsika ny tany, ndao isika handeha ka haka azy. Josoa, efa tsy izy intsony ianao, mety efa verinao angamba ny asa nanirahana anao, tsy manana ilay hery nanananao taloha ianao. Taloha ianao nandre avy tamin'Andriamanitra ary nahalala ny sitrapon'Andriamanitra, ary niasa haingana. Misy zavatra tsy mety ao aminao ao." Saingy Josoa no mpaminany irak'Andriamanitra ary fantany ireo teny fikasan'Andriamanitra, noho izany dia niandry an'ireo izy. Niandry fanapahan-kevitra mazava avy tamin'Andriamanitra izy ary rehefa tonga ny fotoana hihetsehana, dia Andriamanitra no nametraka ny fitarihana feno tao am-pelatanan'i Josoa satria nijanona teo amin'ny Tenin'Andriamanitra izy. Afaka ny nahatoky an'i Josoa Andriamanitra fa tsy ireo hafa. Noho izany dia hiverina indray io amin'izao andro farany izao. Ilay olana mitovy, ilay fanerena mitovy.

Raiso ny ohatra izay hitantsika ao amin'i Mosesy. Io mpaminanin'Andriamanitra mahery voahosotra io dia nanana fahaterahana miavaka, teraka tamin'ny fotoana tena ho an'ny fanafahana

ny taranak'i Abrahama avy tao Egypta mihitsy. Tsy nijanona tao Egypta mihitsy izy mba hiady hevitra tamin'izy ireo ny amin'ny Soratra Masina, na hilavaniny tamin'ireo mpisorona. Lasa tany an'efitra izy mandra-pahavonon'ireo vahoaka handray azy. Niantso an'i Mosesy ho any an'efitra Andriamanitra. Tsy noho i Mosesy tsy akory ilay fiandrasana fa noho ireo vahoaka izay tsy vonona ny handray azy. Nihevitra i Mosesy fa hahazo azy ny olona saingy tsy azony.

Avy eo dia tonga i Elia izay nahatongavan'ny Tenin'ny Tompo. Rehefa vitany ny fitoriana ny fahamarinana ka tsy nandray ny Tenin'Andriamanitra ilay andian'olona tany io izay mpialoha lalan'ny fikambanan'ny Jezebela Amerikana, dia nantsoin'Andriamanitra hiala ny toerana izy ary nanisy loza an'io taranaka io satria nanda an'ilay mpaminany sy ny hafatra izay nomen'Andriamanitra. Niantso azy ho any an'efitra Andriamanitra ary tsy nivoaka tany izy na dia ho an'ny mpanjaka aza. Ireo izay nihezaka ny handresy lahatra azy hanao izany, dia maty. Fa Andriamanitra dia niresaka tamin'ny mpaminany Mahatokiny amin'ny alalan'ny fahitana. Nivoaka avy tao amin'ny fiafenany izy ka tonga ary nitondra indray ny Tenin'Andriamanitra tamin'ny Israely.

Avy eo dia tonga i Jaona Mpanao batisa, ilay mpialoha lalana mahatokin'i Kristy, ilay mpaminany mahery tamin'ny androny. Tsy nandeha tany amin'ny sekolin-drainy izy, na ny sekolin'ireo Fariseo—tsy nandeha tany amin'ny anaram-pianganana izy, fa tany an'efitra no nantsoin'Andriamanitra. Nijanona tany izy mandra-pamoakan'ny Tompo azy niaraka tamin'ny hafatra, niantsoantso hoe, "Efa akaiky ny Mesia."

Ankehitriny dia ndao iskika handray ny fampitandremana ara-tSoratra Masina eto. Tsy tamin'ny andron'i Mosesy izay nohamarinin'Andriamanitra ve no nitsangana i Kora ka nanohitra an'io mpaminany mahery io? Nanohitra an'i Mosesy izy ary nilaza fa izy koa dia nandray avy tamin'Andriamanitra izay hitarihina ny vahoaka ary ny hafa koa mba nizarana ny fanambaran'Andriamanitra tahaka an'i Mosesy. Nanda ny fahefan'i Mosesy izy. Ary ireo vahoaka tany ireo, rehefa avy nandre ny tena Tenin'Andriamanitra marina izy ireo ka nahafantatra tsara fa ny mpaminany marina anankiray dia voamarin'Andriamanitra, ireo vahoaka ireo hoy aho dia nanaraka an'i Kora sy ny fikomiany. Tsy mpaminany ara-tSoratra Masina i Kora saingy ny olona maro an'isa niaraka tamin'ireo mpitarika azy kosa dia

niandany taminy. Tena mitovy amin'ireo evanjelista ankehitriny izay miaraka amin'ny tetik'asany omby volamena tahaka ny an'i Kora. Toa ohatry ny tsara teo amin'ny olona izany tahaka ny toa naha-tsara an'i Kora. Manana ra eo amin'ny handriny izy ireo, diloilo eo amin'ny tanany ary vain'afy eo amin'ny lampihazo. Manaiky ny vehivavy mpitoriteny izy ireo, mamela ny vehivavy hanapaka ny volony, hanao pataloa sy pataloa fohy, ka mamestraka ny Tenin'Andriamanitra eny an-jorony ho an'ireo fombafombany sy ireo foto-pampianarany. Izany no mampiseho hoe karazana voa inona no ao anatin'izy ireo. Saingy tsy ny olona rehetra tsy akory no nihodina tamin'i Mosesy ka nandao ny Tenin'Andriamanitra. Tsia. Ny voafidy dia nijanona niaraka taminy. Miseho indray ny mitovy amin'izany ankehitriny. Maro ireo mandao ny Tenin'Andriamanitra saingy vitsivitsy kosa ireo mijanona miaraka amin'izany. Fa tsarovy ny fanoharana ny amin'ny vary sy ny tsimparifary. Tsy maintsy hofatorana ny tsimparifary mba hodorana. Ireo fiangonana nihemotra ireo dia ho voafatotra miaraka ary mifanakaiky hatrany, efa vonona ho an'ny afon'ny fitsaran'Andriamanitra. Fa ny vary kosa dia hangonina ho an'ilay Tompo.

Ankehitriny dia tiako mba tena hifantoka tsara ianareo ka hahita an'izao. Nampanantena

Andriamanitra fa amin'ny andro farany dia ho tanteraka ny Malakia 4. Tsy maintsy ho to izany satria izany no Tenin'Andriamanitra novelomin'ny Fanahy izay voambara tamin'ny alalan'i Malakia. Naka ohatra tamin'io Jesosy. Io dia mialoha kelin'ny hihavian'i Kristy faharoa mihitsy. Rehefa tonga Jesosy dia ho tanteraka ny Soratra Masina rehetra. Ny andron'ny Jentilisa dia ho ao amin'ny taom-pianganany farany rehefa tonga io mpitondra hafatr'i Malakia io. Ho marina amin'ny Tenin'Andriamanitra izy io. Ho raisiny ny Baiboly manontolo manomboka amin'ny Genesisy ka hatramin'ny Apokalypsy. Hanomboka amin'ny voan'ny menarana izy ary hanohy hatrany amin'ny mpitondra hafatry ny fara-orana. Saingy holavin'ireo anaram-pianganana izy.

Tsy maintsy ho izay ilay izy satria izany dia ny tantara izay miverina ihany nanomboka tamin'ny andron'i Ahaba. Ny tantaran'ny Israely teo ambanin'i Ahaba dia miseho mihitsy eto Amerika izay hisehoan'ilay mpaminanin'i Malakia. Tahaka ny Israely nandao an'i Egypta mba hanompo an-kalalahana, nandroaka ireo tompon-tany, nanangana firenena anankiray niaraka tamin'ny mpitondra lehibe toa an'i Davida, ets., ary avy eo dia nametraka Ahaba anankiray teo amin'ny sez a fiandrianana niaraka tamina Jezebela

anankiray taoriany hibaiko azy, dia tena toy izany koa no nataontsika teto Amerika. Ireo razantsika dia nifindra ho eto amin'ity tany ity mba hahafahany manompo sy miaina an-kalalahana. Noroahin'izy ireo ny tompon-tany ary nalaindy ny tany. Lehilahy mahery toa an-dry Washington sy Lincoln no nitsangana saingy afaka fotoana fohy dia lehilahy tsy misy ilana azy no nandimby an'ireo lehilahy mendrika ireo ka tsy ela akory dia tapafetraka teo amin'ny sezan'ny filoham-pirenena ny Ahaba anankiray miaraka amina Jezebel aoriany mibaiko azy. Amin'ny fotoana tahak'izany no tsy maintsy hahatongavan'ilay mpitondra hafatr'i Malakia. Avy eo ao amin'ilay fara-orana dia hisy ny fampisehoan-kerin'ny Tendrombohitra Karmela. Diniho tsara izao ankehitriny hahitana azy ao amin'ny Tenin'Andriamanitra. Jaona no mpialoha lalan'ny Malakia 3. Izy no namboly ny loha-orana ary nolavin'ireo rafim-pandaminana tamin'ny androny. Tonga Jesosy ary nanana ny fampisehoan-kerin'ny Tendrombohitry ny Fiovan-tarehy. Ilay mpialoha lalana faharoa an'I Kristy dia hamafy ho an'ny fara-orana. Jesosy no ho fampisehoan-kery eo amin'ny anaram-piangonana sy ny foto-pampianarana, satria ho tonga hanohana ny Teniny Izy ary haka ny Vadiny ho any amin'ny fampakarana.

Ny fampisehoan-kery voalohany dia ny Tendrombohitra Karmela; ny faharoa dia ny Tendrombohitry ny Fiovan-tarehy, ary ny fahatelo dia ho ny Tendrombohitra Ziona.

Ny fitondran-tena hafahafa an'i Mosesy, Elia, ary Jaona izay nanalavitra ny olona mba hitoka-monina dia nahavery hevitra ny maro. Tsy fantany fa izany dia satria nolavina ny hafatr'izy ireo. Saingy efa voafafy ilay voa, efa vita ny fambolena. Ny fitsarana no manaraka eo. Nahatanteraka ny tanjony izy ireo mba ho famantarana anankiray ho an'ny olona, noho izany dia ny fitsarana no manaraka eo.

Mino aho araka ny Apokalypsy 13:16 fa tsy maintsy hitsahatra tsy hitory ny ampakarina satria ilay bibidia dia hitaky ny marika eo amin'ny tanana na eo amin'ny handrina alohan'ny hanomezana ny alalana hitory teny. Ireo anaram-piagonana dia handray ny marika, raha tsy izany dia voatery tsy hitory. Dia ho avy ilay Zanak'ondry ho an'ny Vadiny ka hitsara an'ilay vehivavy janga lehibe.

Ankehitriny dia tsarovinareo fa i Mosesy dia teraka ho an'ny asa voatokana anankiray, saingy tsy afaka nanao an'izany asa izany izy mandrapahazoany an'ireo fanomezam-pahasoavana izay hahafahany manao an'ilay asa. Tsy maintsy

nandeha nankany an'efitra izy ary niandry tany; nanana ny andro voatondrony Andriamanitra. Tsy maintsy nisy Farao anankiray eo amin'ny seza fiandrianana, ary ny vahoaka tsy maintsy nikiakiaka ho an'ny mofon'aina, nialohan'ny namerenan'Andriamanitra azy indray. Marina izany amin'izao androntsika izao.

Inona no ananantsika amin'izao andro izao? Marobe ireo mampiseho famantarana mandra-pahazoantsika taranaka anankiray mpitady famantarana izay mahay kely na tsy mahay mihitsy ny amin'ny Tenin'Andriamanitra, na ny tena fihetsehana marin'ny Fanahin'Andriamanitra. Raha mahita ra izy ireo, diloilo sy afo dia tena faly; tsy ahoany izay ao anatin'ny Tenin'Andriamanitra ao. Hotohanany izay famantarana rehetra, na dia ireo izay tsy ara-tsuratra masina aza. Fa nampitandrina antsika mikasika an'izany Andriamanitra. Nilaza Izy ao amin'ny Matio 24 fa amin'ny andro farany dia tena hifanakaiky tanteraka ireo fanahy anankiroa ka ireo tena voafidy irery ihany no hahay hanavaka azy ireo, satria izy ireo irery ihany no tsy ho voafitaka.

Ahoana no hanavahanareo azy ireo? Omeo fitsapana amin'ny Tenin'Andriamanitra fotsiny izy ireo. Raha tsy milaza an'izany

Tenin'Andriamanitra izany izy ireo, dia avy amin'ilay ratsy. Tahaka ny namitahan'ilay ratsy an'ireo vady anankiroa voalohany, dia hiezaka ny hamitaka ny ampakarina amin'izao andro farany izao koa izy, hiezaka hitarika azy ho lasa safiotra amin'ny alalan'ny fombafomba, na hiodina tsotra izao amin'ny Tenin'Andriamanitra ho any amina famantarana izay metimety aminy. Fa Andriamanitra tsy nametraka ny famantarana alohan'ny Tenin'Andriamanitra mihitsy. Ny famantarana no manaraka ny Tenin'Andriamanitra, tahaka an'i Elia rehefa niteny tamin'ilay vehivavy mba hanaovany mofo ho azy aloha, araka ny Tenin'ny Tompo. Rehefa nanao arak'izany nolazain'ny Tenin'Andriamanitra izy, dia tonga ilay famantarana sahaza. Tongava aloha eo amin'ny Tenin'Andriamanitra ary avy eo vao jereo ilay fahagagana. Ilay Teny-voa dia hatanjahin'ny Fanahy.

Ahoana no hahafahan'ny mpitondra hafatra nirahin'Andriamanitra tsy hino afa-tsy ampahany iray amin'ny Tenin'Andriamanitra fotsiny ka handa ny ampahany sasany? Ny tena mpaminanin'Andriamanitra marina amin'izao andro farany izao dia hanambara ny Tenin'Andriamanitra manontolo. Hankahala azy ireo anaram-piangonana. Ireo teniny dia mety ho tena mafy tahaka ny an'i Jaona Mpanao batisa

izay niantso azy ireo hoe menarana. Fa ireo voafidy mialoha kosa dia handre ka ho vonona ho amin'ny fampakarana. Ilay Taranaka Mpanjaka an'i Abrahama, miaraka amin'ny finoana tahaka ny an'i Abrahama dia hifikitra amin'ny Tenin'Andriamanitra miaraka aminy, satria niara-voafidy mialoha izy ireo.

Ilay mpitondra hafatry ny andro farany dia hiseho amin'ny fotoana voatendrin'Andriamanitra. Izao no andro farany araka ny fantatry ny rehetra, satria efa ao amin'ny taniny ny Israely. Amin'ny fotoana rehetra dia ho tonga izy io araka ny Malakia. Rehefa hahita azy isika, dia ho voatokana ho an'ny Tenin'Andriamanitra izy io. Ho voalaza (voatondro ao amin'ny Tenin'Andriamanitra, Apokalypsy 10:7) izy ary Andriamanitra no hanamarina ny asam-panompoany. Hitory ny fahamarinana tahaka ny nataon'i Elia izy ary ho vonona ho amin'ny fampisehoan-kerin'ny Tendrombohitra Ziona.

Maro no tsy hahazo azy satria fomba hafa no nampianarana azy ireo ny Soratra Masina izay noraisin'izy ireo ho fahamarinana. Rehefa tonga hanohitra an'izany izy io, dia tsy hino izy ireo. Ny ankamaroan'ireo tena mpanompon'Andriamanitra aza dia tsy hahazo

an'ilay mpitondra hafatra satria betsaka loatra ny zavatra nantsoin'ireo mpamitaka hoe fahamarinan'Andriamanitra.

Fa ho tonga io mpaminany io, tahaka ny niantsoantsoan'ilay mpialoha lalana voalohany hoe, "Indro ny Zanak'Ondrin'Andriamanitra izay manaisotra ny fahotan'izao tontolo izao," dia ho toy izany no tsy hisalasalany hiantso mafy hoe, "Indro ny Zanak'Ondrin'Andriamanitra avy amin'ny voninahitra." Hanao an'izany izy, satria tahaka an'i Jaona izay mpitondra hafatry ny fahamarinana ho an'ny voafidy, dia toy izany koa izy io ho mpitondra hafatra farany ho an'ny voafidy sy ny ampakarina nateraky ny Tenin'Andriamanitra.

(Avy tao amin'ny *Famelabelarana ny Taona Fiton'ny Fiangonana*)

MALAGASY

©2012 VGR, ALL RIGHTS RESERVED

VOICE OF GOD RECORDINGS  
P.O. Box 950, Jeffersonville, Indiana 47131 U.S.A.  
[www.branham.org](http://www.branham.org)

## Filazana fahefan'ny tompon'ny boky

Tsy azo adika. Ity boky ity dia azo atao printy amin'ny fanaovam-printy ao an-trano ho an'ny fampiasana manokana na ho zaraina, tsy misy sarany, ho fitaovana iray hanaparitahana ny Filazantsaran'i Jesosy Kristy. Ity boky ity dia tsy azo amidy, na adika indray amin'ny refy lehibe, na alefa amin'ny siteweb iray, na tehirizina amin'ny fomba nisy nanesorana, na adika amin'ny fiteny hafa, na ampiasaina ho fangataham-bola raha tsy misy alàlana voasoratra mazava avy amin'ny Voice Of God Recordings®.

Ho an'ny fanazavana fanampiny na ho an'ny fitaovana hafa efa azo raisina, dia iangaviana hifandray amin'ny:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)